

鹿  
裘  
石  
室  
集

鹿裘石室集卷第五

宣城梅鼎祚禹金著

詩

五言古

太常卿上元許公穀

童子時謁許公秦淮里第公年七十餘眼如  
曙星素髮被領飲酒談詩丙夜不倦遽蒙月  
旦之題屬陽春之和數經白門不無西州叩  
策耳

肅皇十四載金鏡臨朱軒八紘方開張中天宅  
至尊鳳儀叶和樂鶴序首騰騫時彥握銓筦國  
器美璵璠累勩紀太常俎豆咸駿奔迥然發長  
嘯拂衣歸丘樊名理宗後進謙光道彌敦舊京  
饒古勝流風六代存媿媿犀柄塵纍纍文木樽  
耆齒宿專榻童牙蚤欵門標鮮粹成賞溘真眇  
不言人情適自會志士非有援冥契久已逝德  
音矢勿諉

駕部郎山陰王公畿

王公爲王文成高第弟子授徒講學歷遊四方余大父行也而引以小友嘗屬予贈之以長歌竟負良約

聖智煩刻畫大道紛多岐高則曠玄幕微則入無倪細大各爲畛至人乃適齊文成挺東越卓哉百代師我君秉遺教惠化相宣綏鳴鸞不停軌徇鐸振先機顧眎予小子冠冕生令儀申命於贈處諭志托聲詩奄忽頓殊路宿負何由追形往神不滅意盡非在辭

大叅盱郡羅公汝芳

羅公學道君子政惟躬化闔郡茲誦上安下  
蘇予舞象之歲召置門下秀才輒以聖域相  
期企而不至末如之何

羅侯秉和德作牧來此都親若冬日燠粲若春  
雲敷苛咎弛烏攫仁心徵雉雖可封幾比屋適  
願罕向隅去此三十載鮮澤猶昨濡愛樹戒翦  
伐其人弗克俱尸祝旣已久竽瑟會軒朱緬昔  
成童日詠歸風舞雩繩我以儒檢置我于中衢

四十迄無聞嗟哉一何愚

憲使嘉禾鍾公一元

鍾公爲郡嚴頗簡貴其課士設科條如臺使者士以文進鮮許可故士亦鮮驩余時總髮每奏一篇獨未嘗不稱善也去後余累困都試公數移書尉藉之

虛已以遊世孤貴乃失和嶽嶽鍾府君表正矯群邪骨體旣疏節臺觀復高華顧

笑不易加從遊在弱歲好我示安儀連城久在

璞卞氏起長嗟哲匠豈載值白日委泥沙洵涕  
中自隱人焉知其他

憲副東郡王公嘉賓

王公由御史出爲郡端醴簡厚無所見材及  
撲滅妖人董代建東溪石梁皆毅然立斷也  
副憲晉陽終于道士民哀慕卽溪之許爲祠  
之

王公南臺彥隼擊氣直前一剖陵陽竹渾璞如  
自然外确中則潤摧觚以爲園已亂制牙豕字

小懲烹鮮東馬臨東溼水流何濺濺鞭石立爲  
梁微禹功不刊急病若在己因攝得成權安陽  
祠稚子舉世稱其賢百身竟莫贖歌舞乃違天

大司馬蜀張公佳胤

張公撫江南拔余秀才及移南鴻臚光祿時  
相與周旋極爲謬許

西臺鎮南服列栢何茗茗威凜負霜雪在邇望  
若遼蹇余備逢掖弱歲忝嘉招片言蒙藻賞頌  
色揚清韶銅官青雀舫金陵朱雀橋出則托後

乘入則命沈醪珥貂既侍中元氣斟斗杓二亂  
東陳師令嚴士不囂鴻勳掩曠代光贊在本朝  
辭爵不待年厚終非有要追念難卒歡短誄寄  
長謠

都勻守楚姜公奇方

公令予邑形寢而重聽能愛士禮予猶至也  
徵爲郎歷守以死有九女無嗣初本江陵同  
里生當柄國不在黨人之列

姜令癯且短疑出焦僥國決獄儼稱神摛文常

抵質造請多不甘禮士如弗及少賤亦誠鄙攝  
衣正賓席郎潛固有年一旦歸謫籍隸夷候前  
麾竹王弔遺跡寧安許丞聾恥屈長平膝生女  
不生男緩急非所益

歙吳山人守淮

虎臣痛飲多酒過來訪予輒自溫克使人欲  
傾家釀也然竟以醉歿

虎臣貌魁梧亦復性堅僻醉罵武安坐狂草孔  
璋檄在衆少所諧向余意多適遙期屆濱于欸

髯展良觀高樓來涼風凍飲恣袒裼聆經踞竈  
觚品泉分鼎鑪還山信信來一一數離逃况爾  
隔重原宿莽久綿羃骨肉化爲土酒家取瓠甌

開州守越史君元熙

史君爲郡司理與余有兄弟之好召拜兵部  
郎出憲豫章以開州謫死於火乙酉之春遇  
吳中別去

靡靡敬亭雲沉沉宛水月司讞決諸曹承嘉謁  
雙闕累合東省香一秉南州節白壁不可爲礲

稊誠易缺州縣徒勞人長歌攄激越天道豈有  
端踰賞乃麗罰甯封乘烟舉冶師策龍發老親  
哭壯子孤雛始燥髮海田遺斥鹵債家爭齟齬  
緬昔吳閶門方舟坐超忽春風拂人裾湖波清  
人骨言晏若平生恒恐行芳歇一別寧復親晨  
暉自興沒哀哉命也夫宦拙年不達

歙程太學本中

子虛華而鮮實安樂不戒自夭年至交友  
尚克令終勝其曹耦

鳩毒安可懷蛾眉實美疾嗟嗟我程生身滅聲  
亦隕胤子絕當戶去婦不唾井稱詩乏精詣負  
材亦旁騁敦交義匪薄古道今誰秉千里局短  
轅萬事畢長寢

隴西金隱君鸞

在衡家金陵亦稱詩而北樂府猶工有蕭爽  
齋詞余時以調宮徵字陰陽相質難然年已  
九十不能正言矣

候人肇西音大夏稱關隴濫觴抵金元俳諧鼓

餘勇康王本秦人填詞傳嫡冢南聲妖而浮北  
聲壯而聳歡儂多潤耳爨弄絕遺種隱君渡江  
來舊都覓供奉切切語淒淒嘈嘈節董董君譜  
肉縱橫予聞腹空洞壁月扇底圓玉樹絲間竦  
長懷蕭爽齋今作舒姑塚

嶺南黎秘書民表

惟敬方南歸自都門貽余詩頃聞已化數月  
前神遊羅浮見道人笠而杖者問之曰姓沈  
問爲誰曰宣城故太史也則予邑君典云

蓬島亦浮峙赤海簸炎州  
賁隅列瑤石柱樹生  
道周耀真握霞氣曾城十二樓  
真人五百首一  
一居上頭黎君太岑寂戲作塵中遊  
上書夸漢主扈從托俳優  
金門歌斫地歲星渠久留  
歸飲神池水平田黍油油黃冠值  
焱忽云是沈隱侯  
初夢若宿昔奄化偕千秋  
憶往去京國新詩遙  
獻酬寸香悉梅檀片甲遺  
靈虬天路坐超越可  
望不可求

姚江葉給事遵

子憲與王君夢暘前後爲皖郡司理凡司理  
執御史之權行部內陰持郡邑短長人望之  
不啻因鬼見帝也二君不然每臨余郡相過  
從譚飲竟夕葉君召拜給事中王君以憂去  
俱病切

石匱翹禹穴盛唐歌漢靈子生挺越秀聿來司  
皖刑玉簡祕已授金科斷逾精樅陽指東渡讞  
奏經宛陵斧決不崇朝溼束非其情引車數相  
造言燕如宿親致身在瑣闥觸事疾風生昌期

乃危論寸心各有因主聖臣則直天道終無親

上饒王司理夢暘

王君癸未之秋別予姑孰飲達旦

昔予卜遵南間走姑孰道王君先行部道路各  
言好折獄必引經儒術冠江表候人宵勤賓衣  
裳主顛倒握手欣載邁相與展宿抱高城面大  
江官廚出清醪慈姥管簫地白紵歌天矯歸風  
蕭涼秋皎月代庭燎明發軫旅懷林曙動棲鳥  
為歡未遽央為別惜草草一廢蓼莪篇憂思以

終老

郎川潘理官嘉

子會能詩多賓客富而好行其德者也為園  
桐上頗幽勝有賦閒園集予序之

潘生本恬穆至性外形崖蓮花汎淥水幕選非  
其材寄賦於拙宦閒居陳素懷為園抗桐汭疏  
鑿悉已裁濠濮托真想魚鳥翳然來徵客非在  
期朝廷尋夕開豈無絲與竹德音多所諧憂樂  
亦何常嘉會臨當乖既予弔其廬曲池臨高臺

懷棟雖尚新黍離已興哀獵豔有遺藻幸不隨  
蒿萊嗤彼石衛尉歿乃悔餘財

歎王山人寅

仲房負氣亮直有古風好譚天下大計不售  
也詩稱述王孟其人並異今山人遊食者乙  
酉秋雨花臺為別春秋八十高矣

峻坂鮮夷轍流俗鮮特操俛仰良有慕惟子庶  
不佻捫蝨譚霸略繫駒虛場苗力田苦卒歲慨  
忼歌且謠右丞工玄理襄陽擅清標血脉尚餘

憤貧賤時見驕老作都市遊友朋昔招邀登臺  
臨大江極望何滔滔一散遂如雨日昃不復朝  
鼓缶嗟大耋風期誠匪姚

歎黃居士一鸞

伯羽寓余郡嘗從徐司馬入蜀復北上死黃  
河舟中其人淹雅有先叔度之風

始予甫羈貫結友半新都謹默雖異尚庶幾華  
實俱僊嶽損靈氣群魅竊天符忿類等封豕射  
影工短狐眉目豈在遠骨肉爲之踈吾黨有黃

子頗不忘其初文弱既可愛辭訥慎不虞汪汪  
陂千頃清濁非有胥蜀臺管書記出谷闕祗車  
歸攜三峩雪乃自太古餘嚴裝戒北首微命寄  
長塗彼輩且良食而使斯人徂

華亭莫文學雲卿

廷韓多材毓風流自憇乙酉燈後西度吳江  
經閭門畱余舟中四晝夜酣呼謔浪畢伎盡  
歡王長公司馬署聞其訃三年耳居常性通  
悅或謾罵溺口旣歿卽所知交謫之而搢紳

猶甚予不謂然也

往春閨闔門麴塵綰新柳停艫望所歡所歡別  
來久契闊未及申長跼指吾口世事勿復譚此  
中宜進酒廣筵永遙夕圓方諸具有吳娃工笑  
倩齧脣併垂手華燈璧月璫火樹金星帚投壺  
驍反百呼瓊雉立偶四日甲至丁連旦卯錯酉  
解維指西虹斟漿懷北斗玄武署中音修文地  
下友含珠各自媚沙礫從衆剖褐衣死仍賤冕  
服不見醜鶴唳遺華亭君更得聞否

新都汪次公道貫

仲淹爲司馬公寵弟嘗北游任俠豪舉後乃  
恂恂精禪理詩道日進而足成蹇題書戲余  
曰吾自有尊足者存佗日過宛上當毋令家  
姬笑耳頓化異物陳几憮然

千載語符會次公醒而狂走馬金臺下射雕陰  
山傷耳後覺風生齧血甘露漿歸來務折節矩  
步不復翔五言列長城筆力鼎可扛何必減驃  
騎秋駕竝騰驥晚益修淨業玄默煥幽光告予

洛迦游海影懸幡幢萬化互紛薄四大非有常  
所冀惟神理繇繇其不亡

蕪湖魯明府崇賢 張茂才增

丁丑杪秋侍先大夫就醫于湖藥饋之隙二  
君數來慰藉也魯君尋授龍游令改官以歿  
緬予在巖侍問藥于湖陰憂至神不泰飲涕惟  
在襟亦有二三子枉駕相追尋張子實恢朗魯  
生多鬱沉浮囂近利市而乃存素心行者天際  
鳧居者籠中禽飛潛寧足異縹忽成古今長江

東湛湛西上有楓林

婺源余秀才羨元

食其落落之士善處貧相值金陵酒家贈余  
詩讀其貨殖傳故可念也

昔君與我遇乃適旋南轅集我平生友鳴瑟薦  
酒尊酒酣起相屬吐贈馥芳蓀貨殖識遺慨仁  
義在侯門固窮亦已久諒有中所有通塞任冥  
會損益乘世根含珠死何爲康哉謚允惇

蒲州楊檢討元祥

檢討太宰之孫弱歲登第余廷試日司分校署余爲首近有客北還以訃至年未三十耳何時負局一置生芻

弘農禮名德四世宅三公襄毅猶矯矯卓有先代風中更挺太史幼穎字小同夕詔待金馬曉漏趨銅龍單辭存隱諷大篇具冲融比予北載牘賜對明光宮濫吹非有獲抱琴徒未工拔茅冀初泰養稚荷包蒙高步雖失騁顧盼有餘容鳳輝方在擢鵬識信終凶短造一爲束脩塗焉

可窮

南粵祁孝廉衍曾

祁生好奇行有匡夷遊詩其遊也裹糧不繼  
乞食豫章及偕計入都聞王長頭者翹色三  
曲貯一徹侯家侯方宴客出佐酒羨仲闌入  
沾醉去嘗三書寓余踰壯無祿咄哉斯人

炎海富珍錯朱明閱寶書羨仲實畸人大文爲  
之舒廬阜峰九牒武夷谿九紆深情惟一往遊  
樂甚獨殊乞食口雖啣平生無贏餘侯家作校

儻闌席就名姝淒清倚瑤瑟薌澤解羅襦酒酣  
長揖別焉知客所如奇服故難常高尚弗克俱  
其人與骨朽終爲達者模良書置懷袖紙襞墨  
不渝

豫章朱王孫多炆

貞吉私去豫章遊金陵入吳手疏問予及報  
之則先逝

赤帝起豐沛子孫多隆準宗條密秋荼天末徒  
引領貞吉愛遨鷄仰屋歎紆軫魚服匿且深龍

文終自炳鍾陵望鬱蔥勾吳美風景豪賢飾羔  
鴈丘壑具牡牝虛往而實皈一室掃充物手疏  
托神交旨已及予吻鴻寶出中壘鶴馭升緱嶺  
仙游雖恍忽差異在人境

四明王編修苴

黃白仲與屠長卿之構讒也太史在館白仲  
既脫獄猶依棲輦下太史以書勸令歸且令  
過宛上以書通予其爲詩曠逸有俊才未見  
其止惜乎

清狂有黃生被褐蒙詔獄既坐梁苑囚復倚秦  
庭哭季孺時時從左驂稅相贖爾盍不蚤歸庶  
其殉所欲渡河瞻夏雲過宛賦秋竹長揖致短  
書中央周四角神寤托古驩足音出空谷消渴  
卧茂陵校讎謝天祿鮮標無重穎洩雲不待族  
大川需巨舟胡卽藏夜壑

合肥黃秘書道月

從呂使君受德卿書詞致斐亶若已載晤其  
時以使事停里門輒爾卽世

進前日不御聞聲乃遙思當其意所會千載不  
復疑黃君生淮北我在蘆之碕蜚沉旣異跡况  
亦隔山陂寄我一書札旨篤陳麗詞衿鞶未及  
飭自顧誠鄙姿殄瘁有餘慨歲月忽若遺永世  
不必年好爵焉久縻因風屬宵寢一接瓊樹枝

義興王叟玉

叟河橋販履人也甲申十月予適吳覆舟前  
渚叟具賓禮畱信宿越八年復還自吳則叟  
亡矣且無嗣見其嫗薄脩賻焉

東行徑義興太湖縈枉浦望之無涯淚凌空舟  
航舞衡飈忽驚揚墨雲夾烏舉地非破冢名客  
與沈湘伍妖夢或相踐微命屬如縷中心若有  
憑澶洄薄孤嶼羈人感營魂老翁來慰語且無  
悔垂堂安能免征旅燎衣踞竈觚饋漿脩列俎  
童僕亦果然面色異敦土一飯良已多浹宿不  
稱窶昨予道茲鄉其人眇莫睹當門尚販履承  
家絕步武彼自哀王孫豈望報阿母下瀨懷投  
金楚楚誰氏女一歲予七奔循髮涕成雨

知希齋詩爲王德操

蜉蝣亦有裳楚楚良自矜  
蝸蟾沸高樹秋露條  
已零希知乃足貴用材在識真  
精言誰致賞子  
獨秉遺靈金闔臨大道青槐被朱輪  
尸居環堵  
間泊然無所營五千猶狡獪  
多取後世稱我斟  
子姑酌惟酒以冥神

戴司封詩

美器不常居至寶無宿寄  
矯矯戴司封資適以  
逢世清通建物宗銓筦符匠契  
鍾陵鬱龍蟠天

闕危鳳跂骨青當爲神色赤賓上帝康莊未及  
騁中馱遽偃轡人貌而天遊榮名寧有旣

其二

中郎頌祖德黃門詠家風于棠尚勿翦維桑必  
克恭矧伊有先烈詒厥昭且融奕奕我府君化  
宣聲益隆適追托遺慕永言將何從斯文庶不  
朽石泐金在銘河圖寶姬錄連城珍楚封所冀  
紹百代惟以善厥躬

金陵哭從弟子馬三首

吾弟頗外朗小亦中了了奈何性流易鴆毒以  
懷寶輿馬驚光華須眉置精佼二八相代射新  
人更言好屈身丞簿間微祿差足飽雖遷未上  
除吏議挂下考歸計誠蕭疎官程復虛杳窺跡  
金陵城依人似飛鳥鷓鴣已就質犢鼻併如掃  
好色不自刺疾渴焉及老有兒俱未立寡女不  
相保搦管聊翩翩讀書恨草草客死有常期五  
十弗稱天先笑後號咷倚伏理易曉

其二

祚薄漸向衰累弔鮮間賀羣從餘數人茲又弱  
一箇羅剎出門庭昔子被飄墮波臣枯涸轍風  
伯爲搖簸流宕在它鄉拊心遙涕唾子仕本爲  
貧子名甘自挫子終好遊閒子獨堅深卧子飲  
不擇對予飯不妄過有產予不問無家子早破  
年祿併盡今人琴悲不那子行棲蟻郭我生給  
馬磨去畱一無可前後等迭嗟魂兮歸來乎江  
冥秋水大

一生婦人酒不死婦人手聞其當彌留斥婦且  
卻走此婦非汝室此土非汝有遺戒瞑卽葬長  
干一培塿周身皆大布桐棺欲速朽奉生死貴  
薄由來達已久彼狐尚首丘人詎遠父母先塋  
從栗木歸車載廣柳事有違而道茲意汝領否  
俾子何關人莠言寄衆口所剩唯僮奴鬼已瞰  
戶牖白馬鳴蕭蕭集我平生友迺怪親者疎不  
及疎者厚

湖陽船

昔余遊淳湖舟航似鳧出沒在洪濤倏忽適  
驚電及茲登此舟千流天一線蘆蕪屈成篷布  
單張作帆折項且跼足背偃復肘見坐起不自  
由枕蓐接煙爨嚴霜刮若刀尖風穿若箭裁軻  
百尺桅鼓吹震江甸彼乘者何人大鵬而小鷄  
呼酒發浩歌無然乎欣羨

贈張寰應司理四首

有序

張公之爲郡理攝守也會司馬黃公捧賀  
司農徐公在告則君侯皆統攝之敏材而大

度如景光之劍五步不畱行如截海之舟萬斛不加重以故兩造者入而帖然出而果然而日接賢士大夫握手促膝送抱推襟士大夫進而不敢以私請退而各驩然自得也時且稅務繁興民生恒擾君侯奮力以身肩其任而逆折貂璫于數百里之外奸徒裴回不敢驟越境者伊誰之烈耶六邑士民咸願得卽真而兢兢恐未能借焉某不脊有羣小之慍辱君侯俯爲昭雪昔人賦窮鳥而詠鑊魚

要以銜知己申亮節云爾敬撰五言四章用  
代頌言兼志吾過

楚德一何廣百川匯三湘薄言采芳蘭薦爲大  
國香餘芬襲予躬迺在宛之疆宛水極清泠惠  
澤與之長明刑本弼教勿喜視若傷片言不崇  
朝庭階卧桁揚金科斷逾精玉律吹回陽

其二

陽回燕黍生秋巡吳稻熟茲歲且告登旣富亦  
方穀司刑期無刑攝牧宛良牧猾吏負霜雪寒

士被春燠示民庶不佻止竊在不欲四境詠來  
蘇一時封比屋勿翦憩甘棠願借剖符竹

其三

虎符未及剖貂璫倏來臨外蠹由內腐隣壤挺  
姦氓間架旣已稅舟車歲無寧言利析秋毫法  
如秋荼凝誰爲赤子保持我慈母親先威折邪  
謀痼瘵引諸身撫之若覆盂防之若堅城

其四

堅城固金湯鑄書象魑魅蹇予偶一逢葵足不

自衛雖爲親受惡捫舌猶負媿高天鑒微衷敕  
罰辨非類彼懲此大誠我正冀物貴取譬淄與  
澠飲水自知味知己重感恩允哉敦斯義

鹿裘石室集卷第五

終

鹿裘石室集卷第六

宣城梅鼎祚禹金著

詩

七言古

將進酒

將進酒  
斝筯烹鮮擊肥出中厨  
金鏤椀翠羽卮間以白玉繚  
絡之履舄交錯屬所私  
一日千秋與等期在世不  
歌復不飲有錢慊慊持底爲

猛虎行

虎欲齧人不避賢豪虎欲齧人不避賢豪麋鹿  
汝食南山汝巢曷爲斑斑白日而猙獰通都以  
咆哮太山之君吾訴汝汝其引子渡河去

西門行

四座且勿喧聽我歌西門西門主者誰大纛乘  
高軒高軒何昂昂蘭階桂爲堂旋室次龍鱗阿  
閣抗虹梁大子執金吾小子殿中郎大婦工調  
絲小婦織流黃流黃掩明月調絲如鳳皇豐膳  
出中廚長筵羅酒漿珠履宵雜沓羅帷晝未央

亦有霍家奴依倚勢莫當願指鄉里兒作使郎  
鄆倡江海立簸蕩天地爲飛揚天地無情江海  
逆道傷羨者翻嘆惜廷尉門前雀勞劂御史府  
中烏啞啞高臺一以傾曲池一以平我欲竟此  
曲此曲多悲聲

丁丁曲

丁丁漏水統統鼓金缸銜壁璫瑰柱綠珠嫋嫋  
緩聲歌碧玉髮髮垂手舞容儀乍闕或乍舒意  
態如矜復如怒絕纓解珮各忘疲騰觚飛爵紛

無數歌宛轉舞漣娑來日少去日多

送太常周公順之謫海右僉事

公也先朝給事中安昌奕奕稱上公尚方請劔  
主不報丹檻雖折臣無功詔傳緹騎如星火血  
肉從橫行駮駮狃狃虎豹闔闔門沈沈狴犴銀  
鑄鑠丞相欲嗔莫近前余家大夫供橐饘自知  
吾黨甘成錮何幸君心似轉園明堂象魏更新  
制每飯不忘周給事一歲三遷至奉常瑚璉向  
爲華國器天恩浩蕩圖報難一疏風霜白晝寒

敕使且辭玄武仗侍中原重鵝鸚冠使者行行  
趨海右滄波赤日縣青綬鷺鷥胡爲在遠郊麒  
麟自合歸靈囿正直神明必護持擬公賜環終  
有期且攜齋罷如泥酒醉寫蓬萊閣上詩

月夜置酒聽賈珍彈箏歌

明月夜三五美酒斗十千秦箏何要眇賈女自  
嬋娟乍臨掩抑方惆悵翠顰紅潤驕千狀纖手  
初揮多慢聲須臾促柱中寥亮高張疏節轉相  
縈縟彩輕璘最有情一絃一柱芳年映少小生

來指爪清銀甲霏霏歛白雪汨汨流泉忽幽咽  
倚歌鴈足竝成行結怨烏啼還泣血罷彈羅袖  
餘飄飄寶釧寒生玉粟嬌躡履挂冠天欲曙箇  
儂無柰可憐宵

蔡村拜二兄墓

桓山有鳥離哉翻羽翮不得相攀援喑我蘇合  
彈兩丸就中死者心煩冤余行聞此淚霑臆兄  
墓纍纍在山北白楊蕭騷愁殺人孤村風雨逢  
寒食伯仲總角俱有名微言一出四座傾共道

季方難爲弟又稱僧彌難爲兄地戶深沈向誰  
扣若敖餒鬼爭先後如何玉樹着雙埋轉使金  
芝成獨秀樵蘇雖禁丘隴荒十枯春草夢茫茫  
青狐躑躅黃狐立空林落日天蒼涼

金陵下第歸留別許太常邢太史阮憲使  
陳明府金山人盛茂才姚太守朱比部任  
光祿諸公

飄颻飛蓋蹀躞蹄玉壺盛酒青絲提啞啞烏啼  
萬楊柳諸公相送 帝城西渡江初與諸公席

傾心道是文章伯歌來白雪轉孤高歲往紅顏  
輕一擲江草江花映客衣清秋鞍馬無光輝六  
翮自憐生未滿安能振羽上天飛小姬挾瑟當  
筵立含嬌吝彩朱絲濕十年此技始能工徒倚  
齊門不得入公爲我舞我爲公歌歌聲中絕哀  
情孔多商飈吹落木淥水生微波歸去來可柰  
何北山舊堂宿猿鶴南湖片石長藤蘿泥蟠何  
惜千尋底瘞雲駕霧終應起臨岐贈以繞朝策  
他日報之聊城矢

三山舟中聞笛歌

江雲鱗鱗江月白  
幾夜南來隨估舶  
羈魂僚慄私自憐  
飛流界破三山碧  
三山蜿蜒忽若迎  
何處隣舟出笛聲  
泠泠乍鼓湘靈瑟  
嫋嫋如吹子晉笙  
推篷細聽梅花落  
楊柳霜天盡蕭索  
十載關山行路難  
孤舟又向沙頭泊  
昔時司馬謫潯陽  
商婦琵琶涕滿裳  
余亦有才復蹭蹬  
聞笛淒然憶故鄉  
餘音飄蕩隨風止  
夜靜微波淡秋水  
只今人世少知音  
兩耳欲聾心欲死

放歌行贈沈二懋學

有序

沈生大夫之子嘗舉孝廉三對公車矣其人  
績學能文章握槊騎射豪俠自喜尊大人遺  
產千金立散之又負客千金收責紛如其德  
無改親知率私相姍笑之傷哉志也迺贈此

篇

沈生本自游俠子竭來生長朱門裏十五曾隨  
家丈人提兵直度瀟湘水是時幕下賓盡傾縱  
酒談兵俱絕倫楊家蛇矛長丈八四面梨花飛

繞身鳴鏑流星弓滿月蹀躞紫騮看電發白日  
常懸烈士心黃金不鑄男兒骨歸鄉折節疆作  
儒目攝劒術窺陰符餘力頗作文章用萬言磊  
落驪龍珠名高待詔違金馬生也豈是悠悠者  
投書長揖戚將軍往來射獵胡城下飛狐以北  
花馬東九邊形勢在目中却笑匈奴猶未滅封  
侯往往非英雄平生自料多籌畫及說謀身常  
失策客至如雲尊不空逋積如山日相索已見  
文君典驕驩更愛孫家墮馬妝有時鳴鞭狹邪

裏有時爭博少年場  
謔浪驪呼百無忌  
但恨揮金不快意  
世人耳目率尋常  
遂令此生成棄置  
此生不顛復不癡  
大賢蹤跡多可疑  
迴山倒海非難事  
一旦雄飛君始知

短歌四章

江南城中萬戶春  
黃金高與北斗鄰  
梅生白眼雙自新  
朝來豆粥頗不惡  
汝曹至竟是何人

其二

中衢冠蓋高如雲  
各誇好手干明君  
梅生沾沾

事古文拋卷一字不成誦飽看西山卧夕曛

其三

何者其智何者愚丈夫自管七尺軀嚶嚶月旦  
胡爲乎我有一語向汝說花間好鳥名提壺

其四

阿翁青門學種瓜阿弟素壁漫塗鴉兒跳虎子  
邀父誇我生如此良快意諸公爲我勞咨嗟

送胡師棄官還武林

莫道官貧是廣文孤筇還帶敬亭雲莫道廣文

官不貧一瓢空領西湖春敬亭雲散先生去西  
湖春好先生住先生之去何所貽春風何處不  
相思先生之住何所爲春花何日不相期人生  
得意未足奇人生失意豈足悲是耶非耶千古  
知安能折腰事小兒苜蓿可餐良不惡白髮當  
年且行樂逋僊候客有雙鶴訪君借騎而同游  
乎寥廓

淮陰吟

市中少年眼如虎不識王孫反相侮漂母何意

壽千金但托英雄一片心舉世悠悠堪自見丈  
夫豈必長貧賤漢家恩淺望報深相君空有封  
侯面至今淮水向東流韓信城邊古木秋獨餘  
阿母還祠廟芒碭飛雲已盡收

鄆山贈王仲房

五年之前我遇君敬亭奇峰生夏雲五年之後  
君遇我鄆山花片當筵墮君年七十如嬰兒余  
雖少壯不逢時羨君有錢不自惜羨君有酒能  
自持世上交情何用見更誰不解輕貧賤有錢

即使無酒沽人生那願空爲儒

太平酒肆贈孫少府

行行馬首遙停轡中道逢君把君臂山縣桃花  
春欲燃買醉踏歌來酒肆羨君二麥已逢秋問  
君免官何所求數錢正有河間女擲瑟還工子  
夜謳歌聲宛轉春風裏雜坐遺簪兼躡履  
玉媽紅燭膩黃共祝丈人無遽起高陽之徒君老  
矣嗟嗟高陽之徒君老矣

琴溪登琴高釣臺

絕壁削金蓉寒潭沈碧玉與懷垂釣人長歌采  
芝曲采芝垂釣度千年赤鯉何緣竝得仙一自  
刀圭灑流水纖鱗猶借藥名傳雨苔久蝕磨崖  
字停鞭惆悵前賢事馬頭有酒不須沽逼人春  
色釀于醉

弔禰衡

有序

正平劉氏忠臣也其孔楊之許匪獨才相埒  
蓋所操釣矣阿瞞以虛名籠士士輒景從挾  
炎鼎而畀之甘心焉正平時時哭善詈人賢

者固不可測爾大雅明哲保身豈可與繩斯  
人乎客遊楚當道鸚鵡洲余爲長歌而酌之  
江上語不及黃祖彼人奴足齒哉

大兒孔文舉小兒楊德祖咄咄行尸曾足數生  
平罵座座客驚酒酣擲筆題鸚鵡鸚鵡能言竟  
累身化作武昌江畔土炎精灰冷青蛇妖征西  
將軍坐自驕入幕謀臣傾日月登臺歌吹切雲  
霄掌中已無劉大耳眼底豈知禰孺子何物鼓  
吏解辱人解衣三搥心欲歿黃鵠含冤漢水悲

銅仙清淚憶君垂年年芳草春洲綠狂魄猶堪  
賦黍離

三醉龍使君帳中歌

清霜初報湖中客陰雲出鬼如蟠石今朝又入  
郇家廚一句三醉龍君席龍君豪飲捲白波食  
單事事敵韋何漬蜜鯁鯁那可賞飲乳蒸肫未  
足多更看蒲葉傳新菜別有櫻桃字餽饈平生  
最愛寒消粉此地新煎熟洛河野夫飽食兼大  
醉龍君醒眼雄相視直邀玉女對投壺復催鐵

騎橫鏡吹一官從左祿從微好向文君問典衣  
有酒且開北海座無粟仍守東方饑滴滴蓮花  
漏欲盡天河漸涸殘星隕難辭猶泊孝廉船來  
期再就丹陽尹

臨江謠

江鬼灑雨江雲飛江風激矢射客衣日暮佳人  
何不至天寒遊子胡不歸臨江者誰百憂集怒  
濤噴雪山山立檝摧維絕可柰何長跼勸公無  
渡河

宣城雜詠十首

懷僊引

四千仞高凌華頂三十六峰割溟涬當空冉冉  
飄玉壺就中煜煜留金鼎軒轅道成迎白龍小  
臣攀髯不得從斷鱗殘甲飛滿谷至今變作黃  
山松珠履風前躡寥廓洞庭鈞天聞廣樂琴高  
淥水出頰魚子安碧樹呼黃鶴陵陽僊者五六  
人瓊芝瑤草照青春一朝揮手辭妻子方識吳  
門梅子真

項王廟歌

嶧山遺廟何堂堂風吹女蘿鬼跳梁揚枹拊鼓  
供伏臘父老猶能說項王鎬池貽璧祖龍死叱  
咤喑鳴提劍起是時楚有武信君八千飛渡錢  
塘水漢兵四面忽楚歌雖不逝兮可柰何東來  
此地曾經略耿耿英風尚不磨帳下千峰如列  
戟斷鏃含腥土花碧漢家寢廟遊衣冠牛羊夕  
下長安陌

徐夫人謠

謀臣猛士江東有何人得似孫家婦孫家有婦  
身姓徐良人五馬丹陽守丹陽太守日會賓徐  
言不吉卦有神誰知衷甲出堂下迺是山中亾  
匿人操符入居都督府夫爲鬼兮妻爲虜帳前  
傳語徐夫人急速來叅新府主徐笑使君亦何  
愚使君有婦妾有夫佯稱除凶纔卽吉密呼宿  
將陰相圖府主聞之大歡喜薰香沐浴新妝理  
下階設拜禮未周一呼兩君壁間起手提髑髏  
祭夫墓腥血模糊染丹樹一軍始倉皇吳主驚

前顧衆人有眼皆迷離安能辨爾雌雄兔

宣城內史行

東南天狗忽墮地轉憶咸和年間事晉朝養將  
如養虎掉尾眈眈反相制宣城內史鳩義兵立  
表陳師出有名瞥若鷹鷂逐鳥雀臨危豈得顧  
其生脫身轉戰湖山下頸血濺天天欲赭客豪  
野歿諒不葬駑馬徘徊在中野卞公廟食帝  
城闔湖山亦祀桓茂倫丈夫行藏各自取眼底  
區區安足論君不見歷落嶽嵒可笑人

登樓吟

昔年十四五三登謝朓樓樓上何所有四邊樹  
木何脩脩謝公五馬快遨遊高齋晝掩歌且謳  
茲事以往爲千秋千秋李白達者儔信美吾土  
聊淹留大言小言鎮相續星辰歷歷紛纏糾敬  
亭片石挂五嶽宛水一勺環瀛洲向來此物大  
顛顛眇也凶終白也囚近者濮陽李尚寶半刺  
不得留宣州眼前富貴兼壽考萬事由他自點  
頭

倚角謳

隋家天子愛風流  
艷舞嬌歌醉不休  
楊花欲落李花結  
錦帆三月下揚州  
逐鹿中原爭嶽嶽  
梅公左公相倚角  
五色龍文起晉陽  
赤縣黃圖歸掌握  
英雄自古識天機  
盡束橐韃拜御衣  
星列羽林縣劔佩  
江開鴨綠閃旌旗  
大將功成盟帶礪  
分茅胙土傳苗裔  
空山廟貌垂千秋  
颯爽英靈朝上帝

都官篇

吾家都官殊有名五言破的何錚錚重譯西南  
開萬里直從此地起長城廬陵爲友眉山弟金  
錯囊羞短裘敝虛聞清廟薦遺音閭闔徘徊辭  
上帝祠有雀角墓有狐鴟尾剝落龜斷趺詞人  
千古厄陽九後代衣冠乍有無尚書嶧陽一坏  
土白楊斧作豪家柱山鬼挪揄大道傍再拜高  
歌淚如雨

南園歎

颯颯秋聲射人耳我來倚杖南園裏此園舊屬

吳丞相隴上耕夫傳故址憶昔新開綠野堂成  
功願遊赤松子驅石蓬萊幻作山穿池太液規  
爲水金榜嶙峋鳥篆文瑤篇寫奕鸞回紙丞相  
不樂主亦憂北人飲馬瀟湘汴丞相已老主好  
少須臾一斥循州歿吳家園頭草樹荒葛嶺湖  
濬樓觀起世間代謝每如此君不見江潮斷信  
胡風腥年年杜宇哭冬青

叩馬辭

六龍飛駕燕中起大風蕭蕭渡易水羽林十二

散星文石頭城下鼓聲歿殿中催召陳尚書慄  
慨悲歌氣不舒一時殲血報皇祖六子同甘鼎  
鏹餘衆謂逆鱗不可批臣將叩馬效夷齊計家  
橋頭骨已朽孤鳧夜夜吐虹蜺 詔傳故里崇  
尸祝桂酒椒漿堪一哭徒薪曲突亦有恩開元  
寺前俞伴讀

史鳳曲

史家小女字鳳皇五色高棲玳瑁梁步障千重  
圍錦繡流蘇四角佩琳琅此時盡上宣城道此

時盡說青樓好燈張瑤席瓊蓮寒枕依羅薦神  
雞曉門前車馬絕凡賓鳴玉鏘金共結親何人  
得人迷香洞生綠羅屏字字新一片香名滿人  
耳江南萬斛春如水至今花柳不敢驕都向秋  
風憔悴死

落石臺陳休寧德基招集陳仲魚以一葦  
游從

海陽茂宰擅風流落石邀賓溪上頭溪光倒射  
斜曛碧乘興先爲一葦游此石何年落此水灘

聲嘈嘈石齒齒倚歌白雪座中生把劍長飈蘋  
末起紫簫玉遂醉重聞彷彿釣天下五雲逍遙  
何羨雙飛鳥縮地方壺偶對君夜半星河在人  
袖君乎酣舞爲余壽壽客寧用千黃金一傾百  
斗交非偶百斗猶勞破俸錢憐予名藉酒人傳  
南山扣角空成詠鍊石看君自補天

送王律

莫逢路人誇百篇莫笑歸囊無一錢燁燁金光  
坐自把不將名姓市中傳沽酒與君歌此曲酒

似瓊蘇聲似玉當歌飲酒且勿辭明日挂帆江  
水綠

種竹篇諸叔伯仲集賦

西園種竹將萬箇日午閉門溪上卧閒知看竹  
亦有人拂衣片片清陰墮小阮雖貧不願醒請  
公傾倒白玉瓶睥睨一世少如意但對此君雙  
眼青七賢六逸彼誰者爾曹豈合居其下何論  
身後更崢嶸會是眼前真脫灑實可食兮鳳不  
來未須垂歎已焉哉渭川千畝自吾分且截長

竿坐釣臺

春夜吟

夜午起鳴絃春靜流雲濕殘雨滴西簷疎燈耿  
東壁黯然無語調何深自信悠悠千載心却擲  
孤桐愁掩枕青山迢遞曉猿吟

賦畫贈五從弟誕生泮游

丈夫致身青雲耳安事低眉二三子卽今吾弟  
少多材况復高標清照水汝南世胄自名儒振  
藻鳴璫竝駕趨近以一毛爭識鳳遙知千里共

稱駒玄廳萬丈迴天末涼金一片澄秋色灑灑  
玉露綴瑤柯馥馥瓊花依貝闕阿翁春滿九霞  
杯瑞雀西從阿母來醉把燕山五枝詠笑它豚  
犬何爲哉

登保豐臺懷李白

寒城眺平楚秋水吹微波我憶青蓮李居士酒  
酣慷慨發高歌徵君埋玉王郎死眼中寂寂二  
三子謝樓輟響臨風篇崔亭空望飛簷水彩虹  
雙落鏡光開片片梅花笛裏推但許白沙留月

色可憐清夜聽猿哀抽刀斷流流不絕明日扁  
舟期散髮我有仙骨君不知控鯉乘鯨共超忽  
長歌招白白不還安知余輩非探環衆鳥孤雲  
宛如昨相看不厭敬亭山

憤歌

空將七尺號昂藏終夕仰面看屋梁世事都歸  
華表鶴人情大似中山狼困來魚服且自匿時  
去雀羅真可張山鬼躑躅禿鶯怒白日無輝天  
雨霜我欲排雲叫閻闔生身羽翼那得長君不

見南溟之鯤忽爲鵬鵬之大不知幾千里扶搖  
直上會有期汝輩搶榆枋已矣

解歌

有腰不折貴人前有口且就黃公邊世間萬事  
吾不理一事但醉壚頭眠多病寧爲小兒苦片  
語自擅千秋權今年復收數斛麥負郭猶餘種  
秫田涼風北牕亦不惡爽氣西山劇可憐君不  
見道上之石忽爲羊羊無何兮一叱化爲石人  
生變幻安足期雌伏雄飛各有適

吳仲子歌

生子當如孫仲謀吳家仲子俠者流三江遊博  
稱大估列編裘珂居上頭曾中壘塊大於斗何  
以澆之一杯酒男兒得志惟片言安用戚促摧  
顏而俛首弟畜灌夫父事朱家長虹貫白日短  
劍發丹霞細腰伎犁眉騮相逢劃地作交賒紫  
槽鷓絃解手語千金立散隨泥沙竭來放歌復  
高枕人生萬事畢長寢滿堂賓客奉君驩椎牛  
考鐘縱吾飲江南十月鴻鴈翔北風吹馬馬毛

僵子兮翩然還故鄉  
行行送子宛之曲  
敬亭之陽  
角弓霜勁寒欲張  
吁嗟乎草間狐兔那足數  
子歸且射南山虎

蒲上望文脊山雪

文脊山中雪幾丈  
峰峰玉削屹相向  
昨春之仲憶曾游  
愁來拋却青藜杖  
其時題壁琬琰垂  
至今鬼神爲護持  
層冰巉巖不可度  
麋鹿僵卧猿啼饑  
東林暮鐘虎溪月  
寒響清輝相映發  
平生微尚丘壑間  
將往從之意超忽

吾若行與叔箕

吾爲楚歌若楚舞胡爲與若生此一拳土相看  
各握徑寸心平居忽往在千古千古悠悠只眼  
前寸心何預他人權文章有神交有道杜陵吾  
汝爭後先汝無黃金高北斗亦無纍纍之印縣  
其肘空餘傲骨頗巉巖世間萬事不挂口風流  
闌入少年場安得不顛復不狂寧堪工瑟投竿  
好難將甘李代桃僵敬亭亘百里宛水照百尺  
左提謝玄暉右挈李太白紀家老春舊所聞飲

酒賦詩差自適鄉里兒童紛項領招來五丁輕  
一擲丈夫生不成名那足惜吾與若兮五兩蒲  
帆一兩屐

畱都客舍沈太史寄酒錢歌

腰間有骨不能折懷中有刺不肯投雙眼茫茫  
對天白興來忽作長安游長安東關連南陌銀  
臺畫閣金張宅子雲筆札君卿舌若箇傾心能  
愛客故鄉故友頗殷勤寄我杖頭錢百文乍許  
青州供從事不隨醉尉訶將軍酒酣擊筑行都

市白日蕭蕭聲變徵和歌不復見荆高一片雄心托誰歿城外纍纍似北邙小者爲侯大者王玉魚金盃那可數鴟鳶狐兔侵其傍富貴真看艸頭露不如飲酒被紈素張星見說去人間樂府空傳桃葉渡袒跣大叫高陽徒更向黃公問舊壚紀叟老春亦不惡是龜是貂君換沽君不見唐朝供奉酒中仙天子呼來不上船余其斗酒爾百篇何不來長安市上酒家眠

五浮山人歌贈俞策

五浮山人稱大雅白袷烏巾大瀟灑結交海內  
半豪賢有懷爭向山人寫去年曾刺蜻蜓舟訪  
我宣州謝朓樓一醉夏雲堪十日當壚畱却鷗  
鷺裘今年逢我長安陌御溝楊柳粘天碧信陵  
公子長虛左票騎將軍重揖客自言七尺生自  
天縱貧不受朱門權翩翩獨過長千里花月長  
干並鬪妍但持片語能生翼但教再顧真傾國  
盧家莫愁怯不前王家桃葉驕不得少年場中  
意氣麤千金那惜買歡娛有時醉把如意舞紫

霞錯落摧珊瑚君不見劉盤龍樗蒲一擲百萬  
空又不見陶五柳三十萬錢盡沽酒古人往往  
俱有之山人山人君莫疑錦囊羞澀尋常事丈  
夫安可下從屠沽兒嗚呼慎勿下從屠沽兒

送龍郡丞自宣州還于湖

東城南陌花如霰阜蓋翩翩肆清讌明月孤寒  
蕩酒甌流雲天矯迷歌扇十日酣呼挾布衣自  
公行樂有光輝澄江淨練玄暉郡峭壁飛霞巖  
子磯吐君左君不怒卧君側君旋顧耿耿夜飲

籌無數落筆蒼然莽烟霧五馬躊躇大道傍臣  
馬驪兮君馬黃投鞭欲斷濁河水青天並駕相  
翱翔

相逢行同諸子集王氏醉賦

子真甘隱吳門卒步兵亦有窮途哭伯倫爾是  
醉鄉侯麻衣世習僊姑術程普曾傾四子交昔  
賢善喻飲醇醪狂來把手各大叫醉過王家聽  
鳳簫王家女兒年十四一日芳聲徧鶯市談笑  
頻能解辨圍盼睐便自成名士殷勤斗酒壽我

前朗然誦余秋水篇少年肝膽誰行吐萬古閒  
愁此物捐滄海茫茫一何大翻令婦女憐豪邁  
諸葛不來期也歿黃金散盡臺猶在時乎時乎  
未可憑恍兮塵土倏風雲平陽家奴尚貴主灞  
橋醉尉訶將軍江令還鄉頭尚黑尚父登車鬢  
看白丈夫會合元有期佳人一失難再得君不  
見淮陰進食哀王孫齊楚分符漂母恩上林客  
遇文君日還著臨邛犢鼻禪

送潘伶還郎川寄主翁子會

玉奴昔侍齊天子步步金蓮出秋水郎川窈窕  
人姓潘探環猶憶前身是扁舟三月敬亭間春  
花爛熳春雲閒白日徵歌夜行酒雲嬌不動花  
無顏已恨逢遲別何早攬涕含顰向人道人世  
流飈激斷蓬東西南北誰相保江邊折柳送將  
歸鏡裏鴛鴦作隊飛隴山政有青青樹傳語開  
籠放雪衣

寄張大來

梅生二十稱狂夫論交張季高陽徒竭來把手

輒覓醉有時披髮或相呼大兒文舉小德祖餘  
子紛紛安足數塵世偏窄天地寬落魄偏容吾  
與汝笑殺閉門誇艸玄但供覆瓿真可憐假令  
讀書破萬卷何如荷杖懸百錢自昔跳梁終此  
物白眼追隨看亦得會當擊浪北溟頭且須射  
獵南山側豈必古人不易逢卽今鞭弭失西東  
琴溪結冰敬亭暮飛夢蕭蕭寒雨中

贈劉玉峰先生

君不見陶靖節有腰嬾爲五斗折又不見李令

伯一表陳情人嘖嘖請看吾黨劉先生先生作  
今在漳平漳平賢令稱三子聞說先生更起聲  
風木無端生恨別烏烏私情空淚血飛書乞身  
還故廬十載片心猶暗結羣流但識拂衣高那  
識先生意獨勞可憐眼底悠悠者且向風塵戀  
敝袍舊時松菊開三徑巾車孤棹閒乘興久矣  
爲農信自驩躬耕卒歲供懸磬耕塢曾傳樓使  
君北門水石對斜曛千秋雅調遙相接况復蟠  
胸玉笈文大兒春酒介眉壽小兒書籤不停手

曰孫文顯是吾徒古古今今常掛口天將爾輩  
報家公鳩杖逍遙七十翁芝蘭當砌如林盛轉  
嘆南游浪斷蓬劉先生梅叔子叔子少狂虛兩  
耳先生令伯及淵明叔子耳中堪著此

送馬景顏還建康

與君宛水憐分手楊柳青青逼尊酒試聽明朝  
夾道鶯那似尊前求友聲鳩鵲樓深春日媚鳳  
凰臺迴晴雲麗攀輿艸賦粲金花拄杖高歌落  
綺霞片颿衝雨江南去一醉不知人兩處靈槎

擬駐石城頭共唱秦淮夜月秋錦囊已辦珠三斛  
早趁湖光報莫愁

青樓怨

有序

周氏女本金陵人幼給繫宣之平康居四年  
已從歙人去又凡兩年迺其輕薄兒捐女中  
道無所歸復歸平康其所遭竟若此然則人  
遇不遇固自有司焉嗟乎寓內事類若是哉  
援筆衍其實篇四十句

馬蹄蹀躞東風早揮鞭笑徹青樓曉中有一人

閒且都長跼牽衣嚮余道妾家元住漢江濱曾  
識長安萬戶春浪逐秦淮渡頭客翻爲巫峽夢  
中人璫管雲嬌凝貝齒銀甲冰寒澀萋指麝譚  
瑤塵學縣河貂貴脂輪妒流水含態臨叩數酒  
錢傷情京洛賣花船黛眠陌柳煙霜褪珮擷臯  
蘭歲月捐嗟哉妾命薄於紙轉誤紅顏冶游子  
初夕同懽誓鳳屏此生終分違鶯市鳴燕鳴鳩  
自好速飛花飛絮不關愁乍憐秦帶猶裁晚誰  
信齊紈已逗秋衣弗厭新人厭故傾囊別選邯

月三十一日  
鄂嬾丹葩辭樹豈重榮  
滄海馳東復西顧青吐  
蟲絲網翠冠黃纖桐葉砌  
瑯闌牀頭人共千金  
散湖上家徒四壁寒  
熒熒弱質歸何處買舟又  
望章臺路妍媸靡定由君心  
離遇難常任天數  
入門羞盡合時眉覽鏡還思舊日姿  
雙珠落地黯無語借問傍人那得知

贈沈君典

腹有五經笥不如一囊錢  
懷有千乘璧不如二頃田  
有田種秫可供酒有錢結客可爲壽  
平生

然諾不稱心眼底虛名亦何有四壁熒熒笑沈  
郎獨持意氣少年場啁啾燕雀難欺得俠骨由  
來死亦香

除夕篇

飲酒終歲不稱情學書十年纔記名雪飛如掌  
臘欲盡明朝萬戶東風生有錢嗷嗷坐自惜金  
高北斗更何益春色媚君君不知但逢落花空  
怨憶予亦平生澹蕩人長吟欹枕傲青春浪說  
事了拂衣去稷契安兼巢許倫

陸叔平作虎丘圖文徵仲以豫章法書二  
詩詩絕類趙吳興余爲歌

包山老人吳中老暮暮朝朝虎丘道解衣盤礴  
心手和棗興生綃時一掃乍看咫尺蒼翠流四  
邊樹木風颼颼頓令陸羽泉驚齒更遣生公石  
點頭雲氣淋漓椒千頃可中明月秋光冷倉皇  
碧沼發蓮花髣髴青天來鶴影亭中偶坐兩丈  
人其一將無短簿珣不巾不屨顏貌古或者爲  
傳支遁神雖非重巖與疊嶂瑰詭幽森殊萬狀

指端遂奪造化功地靈山鬼俱惆悵文家太史  
絕愛之豫章書法吳興詩揮毫忽見蒼龍走臨  
畫如聞白虎窺任爾黃金高北斗連城雙壁落  
吾手平生微尚止壑間少文臥遊堪皓首

鹿裘石室集卷第六 終